



Moÿse voulant montrer à Pharaon qu'il estoit enuoyé de Dieu , ietta sa verge, qui fut changée en serpent.

LE Seigneur dit à Moÿse , Iet'ay constitué pour Dieu à Pharaon, & Aaron ton frere sera ton Prophete, auquel tu diras tout ce que ie t'ay commandé, & il parlera à Pharaon, afin qu'il laisse aller les enfans d'Israël de la terre : toutesfois i'endurciray son cœur, & multiplieray mes signes & miracles en la terre d'Egypte. Et Moÿse & Aaron firent ce que le Seigneur auoit commandé, difans à Pharaon. Le Seigneur dit, Laisse aller les Israëlités pour sacrifier au desert : & pour signe Aaron ietta sa verge qui fut conuertie en serpent. Et les enchanteurs de Pharaon furent lors appelez, qui firent le semblable ; mais la verge d'Aaron deuora leurs verges, & le cœur de Pharaon s'endurcit, & ne leur obeit point comme le Seigneur auoit commandé. Et derechef ils dirent à Pharaon. Le Seigneur a dit, Laisse aller Israël sacrifier au desert, ou autrement tu veras que le Dieu au nom duquel ie parle, est l'Eternel, à qui est deuë toute obeissance ; & pour signe ie frapperay de la verge qui est en ma main sur les eaux, & elles deuiendront sang. Ce qui fut fait, & les poissons moururent : mais les enchanteurs par leur forcellerie Egyptienne en firent autant. Et le Roy ayant veu ces choses s'en retourna, & fut derechef endurcy.